

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 467589 24 St
Tuzla, 04.03.2025. godine

Općinski sud u Tuzli, stečajni sudija Vedran Milašinović, u stečajnom postupku nad stečajnim dužnikom „WOODMAGNAT“ d.o.o, za preradu drveta i promet građevinskog materijala Kalesija, ul. Senada Hodžića Mehdina, nakon provedenog stečajnog postupka, donio je dana 04.03.2025. godine sljedeće:

RJEŠENJE

OTVARA SE stečajni postupak nad imovinom dužnika „WOODMAGNAT“ d.o.o, za preradu drveta i promet građevinskog materijala Kalesija, ul. Senada Hodžića Mehdina, matični broj subjekta 1-13320, JIB: 4209701460007, račun broj; 1544002000393959 otvoren kod Intesa Sanpaolo banke BiH Sarajevo.

Za stečajnog upravnika imenuje se Amir Mujezinović iz Tuzle.

ZAKLJUČUJE SE stečajni postupak nad imovinom dužnika „WOODMAGNAT“ d.o.o, za preradu drveta i promet građevinskog materijala Kalesija, ul. Senada Hodžića Mehdina, zbog nedostatka stečajne mase za pokriće troškova stečajnog postupka.

Rješenje će se objaviti na oglasnoj tabli suda, web stranici suda, Službenim novinama F BiH, te dostaviti FIA.

Pravne posljedice zaključenja stečajnog postupka nastupit će po proteku osam dana od dana objavljivanja rješenja u „Službenim novinama F BiH“, a pravosnažno rješenje će se dostaviti Odjeljenju registra ovog suda, radi brisanja stečajnog dužnika iz sudskog registra.

Obrazloženje

Rješenjem Općinskog suda u Tuzli broj: 32 0 St 467589 24 St od 09.10.2024. godine, pokrenut je prethodni postupak radi utvrđivanja uslova za otvaranje stečajnog postupka nad imovnom društva „WOODMAGNAT“ d.o.o, za preradu drveta i promet građevinskog materijala Kalesija, ul. Senada Hodžića Mehdina, a za privremenog stečajnog upravnika imenovan je Amir Mujezinović iz Tuzle, sve temeljem odredaba člana 61 Zakona o stečaju (Sl. novine F BiH 53/21).

Privremeni stečajni upravnik dostavio je izvještaj o provedenom prethodnom postupku ovom sudu dana 22.11.2024. godine. Iz izvještaja privremenog stečajnog upravnika i navoda datih na ročištu proizilazi da su računi društva blokirani od oktobra 2010. godine, a neki računi od 2016. godine. Društvo ima obaveze po osnovu javnih prihoda prema PU F BiH u iznosu od 235.825,20 KM, prema UIO BH u iznosu od 974,01 KM (što proizilazi iz uvjerenja dostavljenog uz prijedlog). U poslovnim knjigama društvo ima evidentirana i druga dugovanja s tim da bi ista mogla biti utvrđena samo na osnovu prijave potraživanja u slučaju otvaranja stečajnog postupka. Društvo je prestalo sa poslovanjem 2012. godine, kada je prema stavu privremenog stečajnog upravnika nastupila i platežna nesposobnost. Društvo u vlasništvu nema nepokretnosti, nema pokretnih stvari, u poslovnim knjigama je navedeno postojanje potraživanja od kupaca s tim da ne postoji analitika ovih potraživanja, a u slučaju da ista postoje ona bi proisticala iz perioda od više od 12 godina kada je društvo prestalo sa obavljanjem djelatnosti, tako da su ista zastarjela i realno je da su nenaplativa. Protiv direktora društva su pokrenuta dva krivična postupka, jedan za krivično djelo prevara u privrednom poslovanju u kojem je pravosnažno oslobođen, a drugi za krivično djelo porezna utaja u kojem se tereti da je prisvojio novac iz blagajne društva u iznosu od 38.986,21 KM na koji nisu plaćeni porezi i doprinosi i u tom postupku je oslobođen

presudom u prvostepenom postupku a do danas nije odlučeno o žalbi tužilaštva, pa ukoliko bi se eventualno u tom postupku utvrdila njegova krivica tada bi postojala mogućnost da se navedeni iznos potražuje od istog, a teško je pretpostaviti ishod tog spora, trajanje i koliko bi dodatnih sredstava navedeno zahtijevalo.

Dakle, sud nalazi da podnosilac prijedloga za otvaranje stečajnog postupka nije podnio prijedlog u roku od 60 dana od dana nastupanja platežne nesposobnosti (prijedlog podnesen 30.04.2024. godine), da postoji stečajni razlog za otvaranje stečajni postupka predviđen članom 6 stav 2 i članom 102 Zakona o stečaju.

U smislu odredbe člana 103 stav 1 Zakona o stečaju, a u vezi sa odredbom člana 102 stav 7 Zakona o stečaju F BiH, a budući da dužnik ne raspolaže sredstvima za vođenje stečajnog postupka iz kojih bi se mogli podmiriti troškovi stečajnog postupka, sud je rješenjem od 18.12.2024. godine pozvao predlagača, povjerioci i sva zainteresovana lica da u roku od 30 dana od dana objavljivanja poziva u službenim novinama uplate iznos od 12.000,00 KM na ime otvaranja stečajnog postupka, iz kojeg predujmljenog iznosa bi se pokrili troškovi stečajnog postupka.

Rješenje kojim se pozivaju predlagač, povjerioci i sva zainteresovana lica, objavljeno je u Službenim novinama F BiH broj 103/24 dana 26.12.2024. godine, oglasnoj tabli suda dana 19.12.2024. godine i na web stranici suda, kojim se objavama javni poziv smatra dostavljenim.

S obzirom da u ostavljenom roku koji je propisan zakonom predlagač, povjerioci ili neko od zainteresovanih lica nisu izvršili uplatu predujma za obezbjeđenje troškova stečajnog postupka, sud je u smislu odredbe člana 102 stav 8 Zakona o stečaju, donio odluku o otvaranju i zaključenju stečajnog postupka, na način određen u izreci rješenja.

Temeljem odredbe člana 102 stav 8 Zakona o stečaju, rješenje o zaključenju stečajnog postupka dostavlja se nadležnom tužilaštvu Tuzlanskog kantona, Poreskoj upravi FBIH i Upravi za indirektno oporezivanje BiH.

Nadalje, temeljem odredbe člana 204 stav 1 i 3 Zakona o stečaju, a u vezi sa odredbom člana 190 stav 10 Zakona o stečaju, rješenje se ima objaviti na oglasnoj tabli suda, WEB stranici suda, Službenim novinama F BiH te dostaviti FIA, dok je odredbom člana 204 stav 2 istog zakona propisano da pravne posljedice zaključenja stečajnog postupka proizvode pravno dejstvo u roku od 8 dana od dana objave ovog rješenja u Službenim novinama F BiH.

Odluka o brisanju pravnog lica iz javnih registara temelji se na odredbi člana 204 stav 5 Zakona o stečaju.

Na osnovu odredbe člana 206 stav 2 Zakona o stečaju, osnivač društva je dužan preuzeti arhivsku građu i istu predati nadležnom arhivu na čuvanje.

Temeljem odredbe člana 102 stav 8 Zakona o stečaju sud je odlučio kao u izreci rješenja.

Stečajni sudija
Vedran Milašinić

POUKA O PRAVU NA IZJAVLJIVANJE PRAVNOG LIJEKA:

Protiv ovog rješenja stečajni povjerioci i stečajni dužnik mogu izjaviti žalbu Kantonalnom sudu u Tuzli, putem ovog suda, u roku od 8 dana, od dana objavljivanja rješenja u Službenim novinama.

